


長生子



道藏輯要

金蓮正宗仙源像傳

卷

翼集八

師姓劉名處玄字通妙號長生子東萊之武官莊人也生於金
熙宗皇統七年丁卯七月十二日事母以孝聞誓不婚宦視外
物恬不介意屢欲出家母未之許大定九年二月忽覩隣居壁
間人所不能及處書二頌墨跡尙新不留名姓其末句云武官
養性真仙地須有長生不死人師見其筆力遒勁疑異未能決
九月重陽與馬譚邱三師至東萊師往迎拜之重陽顧而笑曰
壁間墨痕汝知之乎師於是傾誠乞爲弟子重陽見其神采不
羣歎曰松之月竹之雪故不受於黃塵乃贈以詩爲立今名字
時弱冠之年也從重陽遊汴明年春重陽仙去師與馬譚邱三
師藏仙蛻於劉蔣廬於墓側三年甲午秋乃溷跡京洛心灰益

寒形木不春人餽則食人問則答十八年秋遷居洛城東北雲溪洞門人爲鑿洞室忽得石井眾方駭異師笑曰不遠數尺更有二井此乃我三生前修鍊處鑿之果然二十一年秋東歸萊州明年就武官故居建庵明昌二年駙馬都尉僕散出鎮萊州惑於讒毀命尉司樂武節追捕下獄俄市人見師於城南與道友接談如常日鄭押衙王受事亦見之意師逃出走視獄中師方熟睡二人驚駭以所見白都尉都尉方悟師爲有道者亟令出之承安二年丁巳章宗皇帝聞風聘召問以至道師對曰至道之要寡嗜慾則身安薄賦歛則國泰上曰先生廣成子之言乎勅近侍館師於天長觀明年三月得旨還山賜贐固辭不受

道藏輯要

金蓮正宗仙源像傳

卷

翼集八
上川文

勅賜故居庵額曰靈虛觀泰和三年癸亥正月東京留守劉昭毅定海軍節度使劉師魯來禮師問道師曰公等皆當代名臣深荷顧遇吾將逝矣不足爲公等友復示頌云正到崢嶸處爭如拂袖歸我今須繼踵回首返希夷二公覽之愴然二月初六日鳴鼓集眾告以去期謂弟子曰各善護持毋生懈怠乃曲肱而逝有仙樂太虛盤陽同塵安閒修真文集六及道德註陰符演黃庭述行於世今洛陽長生萬壽宮卽雲溪三井洞武官靈虛觀卽其故居師登真之所也

元世祖皇帝封號長生輔化明德真人

武宗皇帝加封長生輔化宗玄明德真君

贊曰雪竹月松迴出塵境既悟三生再得二井紫煙橫洞白
雲繞溪桓桓道武前席謙之

道藏輯要

金蓮正宗仙源像傳

圭

翼集八

正一天師清微第三洪百堅製作

道教學術資訊網站